



Borgarráð

Tillaga um breytingu á tilraunaverkefni Reykjavíkurborgar um dvöl barna á frístundaheimili í ágúst frá sumarlokun leikskóla fram að skólasetningu grunnskóla

Lagt er til að borgarráð samþykki breytingu á tilraunaverkefni Reykjavíkurborgar um dvöl barna á frístundaheimili í ágúst frá sumarlokun leikskóla fram að skólasetningu grunnskóla þannig að öll börn sem hefja nám í 1. bekk í Rimaskóla, Breiðholtsskóla og Norðlingaskóla fái boð um að taka þátt í tilraunaverkefninu, sbr. hjálagt minnisblað skrifstofustjóra frístundamála skóla- og frístundasviðs, dags. 25. júlí 2023. Verkefnið var áður takmarkað við ákveðna leikskóla.

Dagur B. Eggertsson
borgarstjóri

Hjálagt:

Minnisblað skrifstofustjóra frístundamála skóla- og frístundasviðs, dags. 25. júlí 2023

Minnisblað sviðstjóra skóla- og frístundasviðs, dags. 2. júní 2023



Ráðhús Reykjavíkur

Borgarráð

Reykjavík, 25. júlí 2023
SFS22030077

Efni: *Tillaga um breytingu á tilraunaverkefni um dvöl barna á frístundaheimili í ágúst frá sumarlokun leikskóla fram að skólasetningu grunnskóla fyrir börn sem eru að ljúka leikskóla og hefja grunnskólagöngu*

Á fundi borgarstjórnar þann 15. júní 2021 var lögð fram tillaga um að börn sem ljúki leikskóla snúi ekki aftur á leikskólann eftir sumarfrí heldur taki þátt í starfi frístundaheimilis fram að skólasetningu. Tillögunni vísað til meðferðar skóla- og frístundaráðs.

Á fundi skóla- og frístundaráðs þann 27. mars 2023 var samþykkt breytingartillaga um að hefja tilraunaverkefni um dvöl á frístundaheimili frá því að sumarlokun leikskóla lýkur fram að skólasetningu grunnskóla fyrir börn sem eru að ljúka leikskóla og hefja grunnskólagöngu. Sviðsstjóra skóla- og frístundasviðs var falið að velja starfsstöðvar til að taka þátt í tilraunaverkefninu og útfæra nánar miðað við sumarlokun leikskóla og frístundaheimila. Verkefnið skyldi hefjast í ágúst 2023 og verði að því loknu metið og tekin ákvörðun um framhaldið.

Þann 6. júní s.l. var samþykkt í borgarráði að hefja tilraunaverkefnið um dvöl barna á frístundaheimili frá því að sumarlokun leikskóla lýkur fram að skólasetningu grunnskóla fyrir börn sem eru að ljúka leikskóla og hefja grunnskólagöngu á eftirtöldum starfsstöðum: Norðlingaskóla, frístundaheimilinu Klapparholti, leikskólanum Rauðhól, Rimaskóla, frístundaheimilinu Tígrisbæ, leikskólanum Laufskálum, leikskólanum Fífuborg, leikskólanum Lyngheimum, Breiðholtsskóla, frístundaheimilinu Bakkaseli, leikskólanum Bakkaborg og leikskólanum Borg. Boðið verði upp á dvöl á frístundaheimilum fyrir börnin frá 9. ágúst nk. til 18. ágúst nk. eða í 8 daga. Kostnaður vegna dvalarinnar fyrir foreldra miðast við gjaldskrá vetrarstarfs frístundaheimila. Fjöldi daga geti þó verið breytilegur eftir því hvenær viðkomandi leikskóli lokar yfir sumarið. Starfsfólk kemur frá viðkomandi leikskólum, grunnskólum og frístundaheimilum og hafa frístundaheimilin þrjú umsjón með verkefninu. Starfsfólk leikskóla sem sinnir sérhæfðum stuðningi fylgir börnum. Gert er ráð fyrir því að börn í 5 ára deildum ofangreindra leikskóla fái uppsögn á sínu leikskólaplássi í júní og komi ekki til baka eftir sumarlokun leikskólanna.

Í ljósi ábendinga sem hafa borist og áhuga foreldra barna, sem eru að hefja nám í 1. bekk ofangreindra grunnskóla, á þátttöku í tilraunaverkefninu er lagt til að í stað þess að takmarka tilraunaverkefnið við börn sem eru að koma úr leikskólunum Rauðhól, Bakkaborg, Borg, Lyngheimum, Laufskálum og Fífuborg að bjóða öllum börnum sem eru að hefja nám í 1. bekk í Rimaskóla, Breiðholtsskóla og Norðlingaskóla að taka þátt í tilraunaverkefninu. Um er að ræða 15 börn sem eru að hefja nám í 1. bekk í þessum þremur grunnskólum sem eru í öðrum leikskólum en þessum sex sem var falið að taka þátt í tilraunaverkefninu. Gert var ráð fyrir 90% þátttöku barna úr leikskólunum sex og miðað við skráningu í verkefnið rúmast þessi 15 börn



Reykjavíkurborg
Skóla- og frístundasvið

innan fjárhagsramma og mönnun þessa tilraunaverkefnis sem verður metið í haust og niðurstaða þess lögð til grundvallar framhaldi verkefnisins.

Virðingarfyllt,

Soffía Pálsdóttir

skrifstofustjóri frístundamála hjá SFS

MINNISBLAÐ

Viðtakandi: Borgarráð

Sendandi: Helgi Grímsson, sviðsstjóri skóla- og frístundasviðs

Efni: *Tilraunaverkefni um dvöl barna á frístundaheimili í ágúst frá sumarlokun leikskóla fram að skólasetningu grunnskóla fyrir börn sem eru að ljúka leikskóla og hefja grunnskólagöngu.*

Reglubundið hefur komið fram umræða þess efnis að elstu börn leikskóla snúi ekki aftur í leikskóla eftir sumarfrí heldur taki þátt í starfi frístundaheimilis fram að skólasetningu. Á fundi borgarstjórnar 15. júní 2021 var lögð fram tillaga: *Um að börn sem ljúki leikskóla snúi ekki aftur á leikskólann eftir sumarfrí heldur taki þátt í starfi frístundaheimilis fram að skólasetningu.* Tillögunni vísað til meðferðar skóla- og frístundaráðs.

Í greinargerð með tillögunni er fjallað um það að með því að opna frístundaheimilin og grunnskólana fyrir þennan hóp nýrra nemenda væri hægt að stuðla að því að þetta stóra skref barns frá leikskóla yfir í grunnskóla verði sem ánægjulegast og þá gæfist starfsfólki frístundaheimila og grunnskóla rými til að mæta börnunum og foreldrum í næði áður en starf skólanna hæfist af fullum krafti. Einnig er bent á að hagræði geti verið af því að útskrifa elsta árgang leikskóla fyrr til að geta hugað að innritun og aðlögun nýrra barna í leikskóla eftir að sumarfrí lýkur. Mikilvægt er að helstu kostnaðarliðir séu metnir og tillagan útfærð og aðlöguð með tilliti til barna, foreldra, starfsfólks og kostnaðar.

Á fundi skóla- og frístundaráðs 27. mars 2023 var samþykkt að hefja tilraunaverkefni um dvöl á frístundaheimili frá því að sumarlokun leikskóla lýkur fram að skólasetningu grunnskóla fyrir börn sem eru að ljúka leikskóla og hefja grunnskólagöngu. Sviðsstjóra skóla- og frístundasviðs falið að velja starfsstöðvar til að taka þátt í tilraunaverkefninu og útfæra nánar miðað við sumarlokun leikskóla og frístundaheimila. Verkefnið hefjist í ágúst 2023 og verði að því loknu metið og tekin ákvörðun um framhaldið.

Stofnaður var innleiðingarhópur sem í sitja Soffía Vagnsdóttir, Ólafur Brynjar Bjarkarson, Soffía Pálsdóttir, Bára Birgisdóttir, Atli Steinn Árnason, Hildur Lilja Jónsdóttir, Sigurlaug Hrund Svavarsdóttir, Elísabet Helga Pálmadóttir og Helgi Eiríksson.

Þeir starfsstaðir sem valdir voru til að taka þátt í tilraunaverkefninu eru: Norðlingaskóli, frístundaheimilið Klapparholt, leikskólinn Rauðhóll, Rimaskóli, frístundaheimilið Tígriskær, leikskólinn Laufskálar, leikskólinn Fífuborg, leikskólinn Lyngheimar, Breiðholtsskóli, frístundaheimilið Bakkasel, leikskólinn Bakkaborg og leikskólinn Borg.

Það eru 136 börn í 5 ára deildum ofangreindra leikskóla og það er gert ráð fyrir að 90% barnanna taki þátt í starfinu eða um 122 börn, sem skiptast nokkuð jafnt milli þessara þriggja frístundaheimila.

Gert ráð fyrir að bjóða upp á dvöl á frístundaheimilum fyrir börnin frá 9. ágúst til 18. ágúst eða í 8 daga. Kostnaður vegna dvalarinnar fyrir foreldra er kr. 14.750 kr. gjald fyrir 8 daga. Fjöldi daga er þó breytilegur eftir því hvenær viðkomandi leikskóli lokar yfir sumarið. Skólasetning í grunnskóla Reykjavíkur er 22. ágúst. Starfsfólk kemur frá viðkomandi leikskólum, grunnskólum og frístundaheimilum og hafa frístundaheimilin þrjú umsjón með verkefninu. Starfsfólk leikskóla sem sinnir sérhæfðum stuðningi fylgir börnum.

Gert er ráð fyrir því að börn í 5 ára deildum ofangreindra leikskóla fái uppsögn á sínu leikskólaplássi í júní og komi ekki til baka eftir sumarlokun leikskólanna.

Verkefnið verður kynnt fyrir foreldrum 5 ára deildanna í byrjun júní og hafa þau frest fram í lok júní að innrita börn sín. Greitt er fyrir dvölinu í lok ágúst og því kemur ekki til að foreldrar þurfi að greiða bæði fyrir dvöl á leikskóla og frístundaheimilið á sama tíma. Eins og í almennu sumarfrístundinni koma börnin með nesti fyrir daginn.

Starfsemin fer fram í húsnæði grunnskólanna þar sem frístundaheimilin eru að reka sumarfrístund fyrir börn í 1.- 4. bekk fram að skólasetningu.

Hingað til hefur aðlögun nýrra barna í leikskóla ekki hafist fyrr en í kringum 20. ágúst og stendur sú aðlögun oft langt fram á haustið. Dvöl á frístundaheimili í ágúst fyrir elstu börn leikskólanna gefur leikskólunum svigrúm til að hefja aðlögun yngri barna fyrr en ella.

Verkefnið var kynnt fyrir foreldraráðum allra sex leikskólanna og óskað eftir umsögnum frá þeim. Umsóknir bárust frá foreldraráðum fimm leikskóla.

Í umsögn foreldraráðs Lyngheima kom fram ánægja með tilkomu tilraunaverkefnisins en kynning á verkefni fremur sein en ráðið styður verkefnið og telur það auðvelda aðlögun barnanna yfir í grunnskólann sinn. Einnig að verkefnið styðji við að leikskólarnir geti hafið aðlögun nýrra barna fyrr en ella.

Í umsögn Fífuborgar kom fram að foreldraráðið telur þetta gott skref í jákvæðri aðlögun leikskólabarna yfir í grunnskóla. Mikilvægt að börnin kynnist skólafélagunum sem koma mögulega úr öðrum leikskólum og kynnast starfsmönnum frístundaheimilisins. Þetta muni auðvelda foreldrum og börnum aðlögun að breyttu umhverfi og þátttöku í skóla- og frístundastarfi.

Í umsögn foreldraráðs Borgar kemur meðal annars fram að fyrirvarinn á verkefninu sé lítill og mælist til þess að framkvæmd verkefnisins verði frestað um eitt ár til að vanda undirbúning betur. Telja verkefnið mikilvægt til að koma yngstu börnunum fyrr í aðlögun og veita þeim elstu tækifæri til að kynnast skóla- og frístundastarfinu. Foreldraráðið bendir á að vistunartíminn, verð námskeiðs og opnunartími sé skerðing frá þjónustustigi leikskólans, hafa einnig áhyggjur af mönnun starfseminnar ef upp koma veikindi meðal starfsmanna. Einnig að það sé óheppilegt að fá ekki þjónustu daginn fyrir skólasetningu vegna starfsdags frístundaheimila.

Í umsögn foreldraráðs Bakkaborgar kemur meðal annars fram að verkefnið sé frábær möguleiki fyrir börnin í hverfinu til að kynnast skólanum sínum áður en grunnskólaganga hefst. Bent er á kosti þess að innleiða verkefnið heilt yfir borgina þannig að verkefnið þjóni einnig börnum sem fara ekki í sinn hverfisskóla. Bent er á ókosti þess að börnin fái ekki heita máltíð í hádeginu. Þar að auki komu fram áhyggjur af opnunartíma og of stuttum fyrirvara á verkefninu m.t.t. undirbúnings og skipulagningar.

Í umsögn foreldraráðs Laufskála kemur meðal annars fram að ráðið telur verkefnið mikið framfaraskref fyrir verðandi grunnskólabörn, góð aðlögun fyrir börnin og geti auðveldað þeim fyrstu skrefin á nýju skólastigi. Foreldraráðið telur mikilvægt að fjármagn til frístundaheimila verði aukið svo þau geti haldið uppi faglegu starfi.

Fjárhagslegt mat á tilraunaverkefninu

Til grundvallar er lögð sú forsenda starfhóps að af 136 börn muni 122 eða 90% nýta dvöl á frístundaheimili í ágúst. Miðað er við að greiddar séu kr. 7.375.-, kr. 12.906.- eða kr. 14.750.- m.v. fjóra, sjö eða átta daga dvöl fyrir hvert barn og heildartekjur séu um það bil 1,5 milljónir króna.

Starfshópurinn leggur til grundvallar að starfsmenn sem komi úr leikskólum verði úr núverandi starfsmannahópi og því feli það ekki í sér viðbótarkostnað. Gert er ráð fyrir að grunnskólar þurfi að ráða allt að 5 stuðningsfulltrúa í tvær vikur í 100% stöðugildi. Miðað við að stuðningsfulltrúi kosti um 600 þús. kr. með launatengdum gjöldum á mánuði. Fimm starfsmenn í 100% stöðugildum í tvær vikur kosta um 1,5 milljónir króna að meðtöldum kostnaði við frágang og ræstingu.

Gert er ráð fyrir að ráða þurfi þrjá starfsmenn í 100% starf í rúmar tvær vikur auk undirbúnings og frágangs. Heildar launakostnaður frístundastarfs eru um 2,0 milljónir króna.

M.v. að tekjur séu um það bil 1,5 milljónir króna og launakostnaður um það bil 3,5 milljónir króna þá eru launaútgjöld um það bil 2,0 milljónir króna umfram tekjur. Gera má ráð fyrir öðrum kostnaði sem geti numið um 300 þúsundum króna. Í heildina má gera ráð fyrir að tilraunaverkefnið kosti rúmar 2,3 milljónir króna umfram tekjur. Hagrætt verður í rekstri SFS til að tilraunaverkefnið rúmist innan fjárheimilda sviðsins.